

Broj: 01-11-681/20

Sarajevo, 03.03.2020. godine

Na osnovu čl.16. i 17. stav (3) Zakona o pravima demobiliziranih branilaca i članova njihovih porodica („Službene novine Federacije BiH“, broj 54/19), federalni ministar za pitanja boraca i invalida odbrambeno-oslobodilačkog rata, d o n o s i

P R A V I L N I K
O USLOVIMA, NAČINU I KRITERIJIMA ZA DODJELU JEDNOKRATNIH NOVČANIH
POMOĆI ZA SLUČAJ SMRTI DEMOBILIZIRANOG BRANIOCA - SUFINANSIRANJE
TROŠKOVA DŽENAZA/SAHRANA DEMOBILIZIRANIH BRANILACA

I OPĆE ODREDBE

Član 1.

Ovim pravilnikom utvrđuju se uslovi, način i kriteriji za ostvarivanje prava na novčanu pomoć u slučaju smrti demobiliziranog branioca - sufinansiranje troškova dženaze/sahrane demobiliziranog branioca, koju mogu ostvariti članovi uže porodice demobiliziranog branioca sa kojima je umrli živio u zajedničkom domaćinstvu u vrijeme smrti.

Član 2.

(1) Zahtjev za ostvarivanje prava na troškove dženaze/sahrane demobiliziranog branioca može podnijeti član uže porodice demobiliziranog branioca sa kojim je umrli živio u zajedničkom domaćinstvu u vrijeme smrti, najkasnije u roku od 1 (jedne) godine od dana smrti demobiliziranog branioca.

(2) Članom uže porodice u smislu ovog pravilnika smatraju se roditelji, bračni partner i djeca koja su živjela u zajedničkom domaćinstvu sa demobiliziranim braniocem do navršene 25 godine života.

(3) Zahtjev iz stava (1) može podnijeti samo jedan član porodice demobiliziranog branioca.

(4) Pravo na troškove dženaze/sahrane ne mogu ostvariti članovi porodice demobiliziranog branioca ukoliko su to pravo ostvarili po istom osnovu od kantonalnog ministarstva, nekog drugog državnog organa ili ustanove, kao i kod poslodavca kod kojeg su zaposleni.

(5) Sredstva za ostvarivanje prava na troškove dženaza/sahrana obezbijedit će se u budžetu Federacije Bosne i Hercegovine (u daljem tekstu:Federacije BiH“) u skladu sa mogućnostima.

II POSTUPAK PRIZNAVANJA PRAVA NA NOVČANU POMOĆ ZA SLUČAJ SMRTI DEMOBILIZIRANOG BRANIOCA

Član 3.

(1) Odobravanje novčane pomoći za slučaj smrti demobiliziranog branioca vrši se na osnovu pisanog zahtjeva koji je sastavni dio ovog pravilnika (obrazac u prilogu).

(2) Članovi uže porodice sa prebivalištem u Federaciji BiH, zahtjev za ostvarivanje prava iz stava (1) ovog člana podnose općinskom/gradskom organu nadležnom za branilačko-invalidsku zaštitu prema mjestu posljednjeg prebivališta umrlog demobiliziranog branioca.

(3) Članovi porodice umrlog demobiliziranog branioca koji žive na području entiteta Republika Srpska ili Brčko Distrikta BiH, zahtjev za ostvarivanje prava podnose Federalnom ministarstvu za pitanja boraca i invalida odbrambeno-oslobodilačkog rata/Federalno ministarstvu za pitanja branitelja i invalida domovinskog rata (u daljem tekstu: Federalno ministarstvo).

(4) Organ nadležan za branilačko-invalidsku zaštitu prema mjestu posljednjeg prebivališta demobiliziranog branioca, nakon zaprimanja zahtjeva iz stava (2) ovog člana vrši provjeru njegove potpunosti, po potrebi vrši upotpunjavanje istog i prosljeđuje Federalnom ministarstvu na dalje rješavanje.

(5) Donošenje rješenja o utvrđivanju prava na novčanu pomoć za slučaj smrti vršit će se nakon objavljivanja prosječne isplaćene netto plaće u Federaciji Bosne i Hercegovine u prethodnoj godini od strane Federalnog zavoda za statistiku.

Član 4.

Uz zahtjev za ostvarivanje prava na pomoć u slučaju smrti, podnosilac zahtjeva je dužan priložiti originale ili ovjerene kopije dokumenata, kojima se dokazuje ispunjavanje uslova za ostvarivanje prava kako slijedi:

- lična karta podnosioca zahtjeva;
- CIPS-ova prijava o prebivalištu podnosioca zahtjeva;
- kućna lista kao dokaz da je podnosilac zahtjeva živio u zajedničkom domaćinstvu sa umrlim demobiliziranim braniocem;
- smrtni list umrlog lica (demobiliziranog branioca);
- uvjerenje o pripadnosti Oružanim snagama (u trajanju od najmanje godinu dana), izdato od nadležne Grupe/Samostalnog izvršioca za pitanja evidencija iz oblasti vojne obaveze na obrascu FMB - 3A (za umrlog demobiliziranog branioca);
- za ZAPOSLENE podnosiocze zahtjeva: potvrda poslodavca da nije ostvario pravo na troškove dženaze/sahrane po istom osnovu,
 - za NEZAPOSLENE podnosiocze zahtjeva: dokaz da su na evidenciji nezaposlenih lica nadležne službe za zapošljavanje ili ukoliko se ne vodi na evidenciji službe za zapošljavanje, uvjerenje ispostave porezne uprave kao dokaz o statusu nezaposlenosti ili ček od penzije;
 - za ostale ZAPOSLENE članove domaćinstva potvrda poslodavca da nisu po istom osnovu već ostvarili naknadu za smrt užeg člana porodice;
 - za ostale NEZAPOSLENE članove domaćinstva dokaz da su na evidenciji nezaposlenih osoba nadležne službe za zapošljavanje ili ukoliko se ne vode na evidenciji, uvjerenje ispostave porezne uprave kao dokaz o statusu nezaposlenosti, ček od penzije ili dokaz o redovnom školovanju;
 - izjavu podnosioca zahtjeva ovjerenu kod nadležnog organa da nije ostvareno pravo na pogrebne troškove u skladu sa Zakonom o penzijskom i invalidskom osiguranju Federacije BiH („Službene novine Federacije BiH“, broj 13/18);
 - Kopija kartice tekućeg računa banke ili ovjerena potvrda banke, sa brojem tekućeg računa podnosioca zahtjeva;

Član 5.

(1) Ukoliko je zahtjev za ostvarivanje prava na sufinansiranje troškova dženaza/sahrana potpun i ispunjava uslove za dodjelu pomoći u skladu sa ovim pravilnikom, donosi se rješenje o ostvarivanju prava na troškove dženaze/sahrane.

(2) U postupku donošenja rješenja ovlašteni službenik je dužan izvršiti uvid i provjeru u sistemu neoporezivih nadoknada, kako bi se isključila mogućnost da je podnosilac zahtjeva već ostvario pravo na pomoć u slučaju smrti demobiliziranog branioca na drugim nivoima vlasti (općinski i kantonalni nivo).

(3) Zahtjevi koji su nepotpuni ili ne ispunjavaju uslove iz ovog pravilnika odbacuju se ili odbijaju posebnim upravnim aktom, u skladu sa odredbama Zakona o upravnom postupku.

(4) Protiv upravnog akta koji donosi Federalno ministarstvo, koji je konačan u upravnom postupku, može se pokrenuti upravni spor kod nadležnog suda u roku od 30 (trideset) dana od dana dostavljanja upravnog akta stranci.

(5) Rješenje o ostvarivanju prava na troškove dženaze/sahrane se donosi u 3 (tri) primjerka, pri čemu se jedan primjerak dostavlja stranci.

III VISINA POMOĆI U SLUČAJU SMRTI

Član 6.

Pomoć u slučaju smrti - sufinansiranje troškova dženaze/sahrane utvrđuje se u visini prosječne netto plaće zaposlenih u Federaciji Bosne i Hercegovine iz prethodne godine, prema podacima Federalnog zavoda za statistiku.

IV PRIJELAZNE I ZAVRŠNE ODREDBE

Član 7.

Ovaj pravilnik stupa na snagu narednog dana od dana objavljivanja u „Službenim novinama Federacije BiH“.

MINISTAR

Doc.dr. Salko Bukvarević

(Prezime, ime oca, ime podnosioca prijave)

(Broj LK)

(Adresa podnosioca prijave i kontakt telefon)

**Federalno ministarstvo za pitanja boraca i invalida odbrambeno-oslobodilačkog rata/
Federalno ministarstvo za pitanja branitelja i invalida domovinskog rata
Hamdije Čemerlića br.2, Sarajevo**

**PREDMET: Zahtjev za priznavanje prava na pomoć u slučaju smrti demobiliziranog
branioca- troškova dženaze/sahrane**

Ovim zahtjevom tražim od naslova da mi prizna pravo na pomoć u slučaju smrti – sufinansiranje troškova dženaze/sahrane za _____ (navesti u kojem je srodstvu bio umrli demobilizirani branilac sa podnosiocem zahtjeva, npr: oca, supruga, sina i dr), inače demobiliziranog branioca _____ (navesti ime i prezime, te posljednje prebivalište umrlog demobiliziranog branioca).

Zahtjev podnosim u svojstvu _____ (navesti u kojem srodstvu je podnosilac zahtjeva sa umrlim demobiliziranim braniocem) demobiliziranog branioca (npr. supruge, sina, majke i dr.).

Uz zahtjev prilažem (u originalu ili ovjerenj kopiji):

- lična karta podnosioca zahtjeva;
- CIPS-ova prijava o prebivalištu podnosioca zahtjeva;
- kućna lista kao dokaz da je podnosilac zahtjeva živio u zajedničkom domaćinstvu sa umrlim demobiliziranim braniocem;
- smrtni list umrle osobe (demobiliziranog branioca);
- uvjerenje o pripadnosti Oružanim snagama (u trajanju od najmanje godinu dana), izdato od nadležne Grupe/Samostalnog izvršioca za pitanja evidencija iz oblasti vojne obveze na obrsacu FMB- 3A (za umrlog demobiliziranog branioca);
- za ZAPOSLENE podnosiocce zahtjeva: potvrda poslodavca da nije ostvario pravo na troškove dženaze/sahrane po istom osnovu,
 - za NEZAPOSLENE podnosiocce zahtjeva: dokaz da su na evidenciji nezaposlenih osoba nadležne službe za zapošljavanje ili ukoliko se ne vodi na evidenciji službe za zapošljavanje, uvjerenje ispostave porezne uprave kao dokaz o statusu nezaposlenosti ili ček od penzije;
 - za ostale ZAPOSLENE članove domaćinstva potvrda poslodavca da nisu po istom osnovu već ostvarili pravo;
 - za ostale NEZAPOSLENE članove domaćinstva dokaz da su na evidenciji nezaposlenih osoba nadležne službe za zapošljavanje ili ukoliko se ne vode na evidenciji, uvjerenje ispostave porezne uprave kao dokaz o statusu nezaposlenosti, ček od penzije ili dokaz o redovnom školovanju;
 - izjavu podnosioca zahtjeva ovjerenu kod nadležnog organa da nije ostvareno pravo na pogrebne troškove u skladu sa Zakonom o penzijskom i invalidskom osiguranju Federacije BiH („Službene novine Federacije BiH“, broj 13/18);
 - kopija kartice tekućeg računa banke ili potvrda banke, sa brojem tekućeg računa podnosioca zahtjeva;

Svojeručni potpis podnosioca zahtjeva _____

Shodno članu 5.Zakona o zaštiti ličnih podataka („Službeni glasnik BiH“ broj: 49/06, 76/11 i 89/11) kao nosilac gore navedenih i dostavljenih podataka saglasan/saglasna sam da Federalno ministarstvo za pitanja boraca i invalida odbrambeno-oslobodilačkog rata/ Federalno ministarstvo za pitanja branitelja i invalida domovinskog rata vrši obradu istih u svrhu realizacije gore navedenog zahtjeva, trajno.